

San Pedro caque

chuteca jun pila

Caque fiqui: Jesucristobe penenaminla duque padeseilainasa, Pedro in pila chutenue yalaca sonba tenca suwachun. In pilabi yalaca payinae niyaque Jesucristobe seque nenanola jonunca. Bersiculo 5:13-bi quirato tenhinsan joe Pedro Babilonia tinun postobi nechí in pila erenueque. Juntonan nun puebloca Babilonia tinanunca miituntsan joe. Pansile Roma puebloca Babilonia tica jonhoe. Wata 62 tsansite in pila quinue.

1 ¹⁻²La Pedro Jesucristochi mantá tan joto in pilaca nulachica erechun quinayoe. Nulari in tote tsachila itolajoe; Diosichi to tsachila jolajoe. Juntonan amana nulari uyan tobi uyan tobi chularae. Weyanla Ponto tobi, Galacia tobi, Capadocia tobi, Asia tobi, Bitinia tobi chularae. Junte chuno jonan, Apa Diosi nulaca numari mántanan wenteno tenca caya joto wentenue. Diosichi Tenca nulaca sen suwato, Diosichi josa carinue. Nulaca wentenue yape Jesucristoca meráminla josa. Yachi asanca nulachi tencabi araletto, jutsa piyarinue. Junni lari Diosibe rocinayoe yape nulaca duque laquirato quirasa. Diosibe rocinayoe yape nula natiya wepanatuto duque pansí chularasa.

Diosica méraminla

³Apa Diosica se tintsan joe. Yari chiquilachi Miya Jesucristochi Apa joto, ya puyacaca mansoncarinue. Yaca mansoncarito, chiquilacanan duque laquirato yachi nalala isa carinue. Junni chiquilari yachi nalala joto, yaca meralarayoe chiquilaca jamochi pansí sonnasa carichunaeque.

⁴Yachi nalala joto, duque senca erensia cuwenta canola joyoe. Tsara sen erensia jochunae. Numatotiya yucapiyatun, unica itun, jochunae. Nulachi tenchi jamochi se rae. ⁵Junni nulari Diosica tennanan, nulaca to yucapiyarino ma fecári cuidaichunae yape jun erensia tsanca calaquisa. Numari jera seca joe jun mate nulaca piyanlelachi cale jera se larichun.

⁶Junca nulari duque son jolajoe. Amanari Diosichi tsachila joto, moora niyaquetiya padeseiminla joe. Tsan jotonan, jun erensiaca son

timinla joe. ⁷Aman nulachi tencari oro cuwenta joe. Oro chibaito piinan, petse lomanhe. Junni nulari Jesucristochi tenchi padeseinasa, nulachi tencabi nechí jutsari petse cuwenta lochunae. Junni oro duque sen jotonan, yucapiyamanhe. Diosica tennano mantimini óroca fécarí sen joe. Jesucristo manquiraino mate tsachilari tenhilaichunae nulari yaca quereimin jominlanueque. Quereiminla jonunca tenhito, nulaca respetaito seque pato, tsara seque quiminla joe tilatichunae.

⁸Nulari Jesucristocari quiratuminnan laquiralarae. Junsí quiratuminnan yabe cayaicala joe. Yabe cayaica joto, patuntsancari duque son timinla joe. ⁹Junni yabe cayaica jonun tenchi nulachi tencaca se larichunae.

¹⁰⁻¹¹Matu mate Diosichi mantate paminlari junca cuenta quito, Diosi nulaca laquirato se larichunae latinue. Junsí Jesucristochi Tenca yalachibi wito, cuenta quisa carinue. Junni yachi mantate cuenta quinato, itsanlatinue: Se larimin tsachi padeseitobi, tsara uraran mantá tan ichunae latinue. Junni tsantintonan, yalanan miitominlanue mo numasi tsanhino jonunca. Junca miichi tinaminlanue. Tsachilaca se larino jonun fiquica duque miichi tinaminlanue. ¹²Junni Diosi yalaca miisa carinue jun fiquiri yalachi tenchi itominueque, chiquilachi tenchi jominueque. Nulari wari ya fiquica meracala joe. Diosichi Tencari jamochi nechí ereca jun patato tsachilabe panue yape jun sen fiquica nulabe cuenta polarilaquisa. Jun sen fiquica anjelilanan miino muquee timinla joe.

Sen tenca tanla

¹³Junni seque tenca cato, sonban tenca ilaina! Jesucristo manquiraitobi, nulaca laquirato seque quichunae. Junni juncasiri tenca cato nenalarana!

¹⁴Matunan Diosichi fiquica miitoto, nulachi tenca munateri nenato, seitonque nenamin jominlanue. Amanari tsanque nenatuntsan joe. Merámin nalala cuwenta sen jolajona! ¹⁵⁻¹⁶Diosi patsanan nulaca yabe cayailaide! tica joe. Junto yachi Pilabi itsanque chutecca joe: Diosi tsara sen joto, nulacanan ya cuwenta tsara sen jolajona! tieque chutecca joe. Junni Diosi nulabe tsantica jonan, nulanán tsanque seque nenalarana!

¹⁷Diosi jeralalaca man parejori miimin joe. Junni jeralalaca man parejonan miimin joto, sen jominlacari se tichunae; seiton jominlaca se tituchunae. Junni yaca nulachi Apa joe titori, yaca jele nenalarana! ya Apachi toca lono fecári. ¹⁸Junni seque nenachun in fiquica meralaquede! Nulachi tsa apalari Diosica tennatuto, tiri cuwenta epele nenanirano micarica jominlanue. Junni Jesucristori nula epele nenaminlaca manse larinue. Orochinan, calachinan pacara quito se laritunue. Oronan calanan mica jotonan, yucapiyamanhe. ¹⁹Crístori nulaca yachi asanchi se larica joe. Matu mate jutsa tenchi opisa nachí asanca larino

jominue. Quiyanpun iton, bichi iton, sen opisa nácari totenun jominue. Junni Jesucristori jun opisa na cuwenta yachi asanca larinue. Junni yachi asan nulaca se larimin joe yape epele nenalaratusa. ²⁰Diosi toca caquituminnan, yaca pato, puyano jochunae tinue. Junni to yucapiyarino ma quello inasa, Cristo nulaca laquirato jamochi nechí patanue nulachi tenchi puyachun. ²¹Junni Diosiri yaca mansoncarito, tsarasi uraran mantá tan suwanue. Junni nulari ya puyato mansonhinun tenchi Diosibe cayaicala joe. Tsanque Diosica tennato meralarae yape se quisa.

²²Tsarasi pacaca meráto, nulachi tenca manseilainue. Jesucristobe pecayaica junlaca laquirachun manseilainue. Junto beco beco tsarasica laquiracaalaquina! ²³Nula Diosibe cayaica joto, casanle nechí na manhica cuwenta jolajoe. Uyan quiraque na manhicala joe. Puyamin ni cuwenta itolajoe; puyatumin ni cuwenta jolajoe. Diosichi fiquica meráto, yachi nalala icala joe. Yachi fiquiri sonban joe Diosibe sonnasa carichun.

²⁴Numatotiya jeraituchunae. Jun fiquica Diosichi Pilabi itsanque chuteca joe:

Jerale tsachila lapa cuwenta moora puyamin jolajochunaeque chuteca joe.

Tsaracari mantá tan tsachila jotonan, lapa luli cuwenta moora jeraiminla jochunae.

²⁵Miya Diosichi fiqui mantimini numatotiya joto polechunaeque chuteca joe.

Jun fiquiri nulabe numa cuenta quica jun sen fiqui joe.

2 ¹Junni natiya pacaalaquituna! Niyaquenantiya natiya encanalaquituna! Nene pato, fe sen joyoe titulajona! Uyanla nulaca feinari, junni paitulajona! Quiranilaquina! Uyanlaca natiya yucacuratulajona! ²⁻³Nulari Diosichi fiquica nasiri miito, Diosica sen joeque miicala joe. Junni amanari tsotsoca nalala cuwenta jonola joe. Nalalari sen cupi duque munaraminla joe tenca tan uwaichun. Junni nulari jun tsanquenán Diosichi sen fiquica munaralarana! fe seque miito se lochun.

Son su cuwenta jonunca

⁴⁻⁸Jesucristobe cayaicala joto, Diosi chunun ya cuwenta jolajochunae. Diosichi Pilabi matu tote Jesucristoca itsanque pato pila chuteca joe:

Quiralaquede! Diosiri israelítalachibi ya quichun su cuwenta tsoreno joyoe tie tinue.

Diosi jun suca duque mica sen su jochunae tie tinue.

Jun suca tsorechun wentecayoe tie tinue.

Junto ya quichun fécarí munaranun su cuwenta jochunae tie tinue.

Junni Diosi tsanque suca cuenta quinato, Crístoca tsantinaminue. Yari son su cuwenta joe. Jun tenchi Diosichi Pilabi itsanquenán chuteca joe:

Yabe cayaiminlari lu tituminla jochunaeque chuteca joe.

Nulari yabe cayaicala joto, yasiri duque sen joe timinla jochunae. Uyanla mantimini Jesucristoca quereitoto, yaca telaquepolaquinue. Jun tenchi Diosichi Pilabi Jesucristoca su tito itsanque chuteca joe:

Suca ya quiminlari jun suca quirato, seitoe tito,
telaquepolaquichunaeque chuteca joe.

Tsan josanan, ya quichun fécarí munaranun su cuwenta jochunaeque chuteca joe.

Junni suca telaqueponun cuwenta Jesucristoca quereitoto munaratiyoe latie. Tsan josanan Diosiri Jesucristoca wenteto, tsara sen joe tinue. Diosichi Pilabi chuteca jominue yalari quereituminla jochunaeque. Itsantinue:

Jun suri quepoisa carimin su jochunae tinue yape quepoilaisa.

Junni Diosichi Pilaca merátoto quepoiminlae. Matute tsanhichunae tica josa, jun tsanquenán patinue. Junni nulanán son su cuwenta jonola joe. Aman jana suca ya quinun joe. Junni nulanán layaito, Diosichi ya cuwenta jolajochunae yape nulachibi chusa.

Junni man talaman cuenta quilaquisa! Diosi nulaca yachi sen patelela suwanue. Patelelari Diosica se tito, yachi ticatiya epe cuwaminla joe. Aman nulari jeralela patelela joto, nulachi tencacanan Diosichi cuwalaquichunae. Jesucristochi mantate tsanque cuwanari, Diosi se joe tichunae.

Diosichi tsachila niyaque nenanola jonunca

⁹Junni nulari tsara mantá tan sen patelela jolajoto, Diosi wenteca sen bolon tsachila jolajoe. Diosichi tsachila jotori, yari tsara se quimin joeque cuenta quinola jochunae. Yucanbe canenaminlanan, nemen minu cuwenta seitonque nenamin jominlanue. Junni Diosi nulaca nemenbi nechí manlaricato, yachi uraran tsenbi seque penenasa carinue. ¹⁰Casale nulari Diosichi tsachila itominlanue; amanari Diosichi tsachila pejolajoe. Casaleri laquiratunun jominlanue; amanari Diosi nulaca laquirae.

¹¹Lanan nulaca laquirato payinayoe. Nulari in tote tsachila itolajoe; Diosichi to tsachila jolajoe. Junto Diosichi tobi chuminla cuwenta in totenan seque nenalarana! Uyan tsachilari yalachi tenca munate nenato, seiton quichi timinlae. Yalari seiton quinato, tencabi yucapiyaminla joe. Junni nulari tsanque nenatuchique tenfelaina! ¹²Nulari Diosica quereituminlachi quelote chutonan, seque nenalarana! Nulari seque nenalarasanán, pansile nulaca seiton jolajoe tinilatichunae. Junni seque quinaminlaca quirato, Diosi yalaca tenhisa carino mate uyan tala palaquichunae. Jun mate Diosica duque seque panola jochunae nula seque quinun tenchi.

¹³Mantaminlaca meralaquina! chiquilachi Miya Jesucristochi tenchi. Nula jeralelaca mantamin miyaca fe merántsan jochunae. ¹⁴Aman ya

miyari uyanlacanan mantá tan suwamin joe. Manca tobi manca tobi mantasa timin joe yape seitonque nenaminlaca casticaquilaquisa, seque nenaminlacari sen jolajoe tilatisa. Junni ya mantaminlacanan merántsán jochunae. ¹⁵Diosiri nulaca tsanque mantaca joe yape nulari ya mantá tanlaca meralaquisa. Junni seque nenato, tenca itonlaca nosa isa carilaquinachunae.

¹⁶Peyun ituminlari patronbe mantaituto yalachi tenca munate pansí nenalarachunae. Junni nulanan tsanquenán pansí nenanola joe. Weyanla mantimini uyanlabe mantaitiyoe tito, seiton quito nenaminla joe. Junni yala cuwenta itolajona! Diosichi peyunla cuwenta jolajoyoeque tenca cato nenalarana! ¹⁷Jeralelaca respetailaina! Acolaca, soquilaca laquiralarana! Diosica jeleralarana! Miyaca respetailaina!

Jesucristo cuwenta padeseinunca

¹⁸Peyunlari yalachi patronlaca respetaito yala panunca meránola joe. Seque mantaminlacasiri merátuntsán joe. Paito paminlacanan meránola joe. ¹⁹Junni pansile seque nenamincanan patronla casticaquilaquichunae. Tsanlaquinari, Diosica tenca cato yaca wantainari, nulaca sen jolajoe tichunae. ²⁰Nula seiton quilaquinari, ¿niyaito casticaquituno junhun? Junni nula tsanque casticaito paituto wantaitori, sen tsachi joyoe titulajona! Aman seque quinamincanan nulaca epele casticaquinari, uyan quiraque joe. Yaca paituto wantailainari, Diosi nulaca sen tsachila jolajoe tichunae.

²¹Diosiri nulaca tsanque mantanae yape padeseinanunca wantailaisa. Crístori nulachi tenchi padeseie. Junni junca tenca cato, ya cuwentanan nenanola joe. ²²Yari natiya jutsa quitumin jominue. Junsí nene patumin jominue. ²³Yaca yucacuralaquinasa, beconan patue. Casticaquinasanan, paito patue. Diosi seque miito casticaquimin joe tito, pansí jonijominhe. ²⁴Chiquilachi jutsa tenchi corosibi wiloito puyae. Yari chiquilachi jutsaca piyarichun puyae yape seque nenalarasa. Ya fudainun tenchi nula manseilaie. ²⁵Nulari opisa cuwenta epele topiyaca nenamin jominlanue. Topiyaca nenaminnan, nulachi tencaca mantato cuidaiminchica manjalaie.

Unilalacanan, sonalacanan payinunca

3 ¹⁻²Sonalanan tencachique unilalabe mantainola joe. Junni yalachi unilala weyanlari pansile Diosichi fiquica merátuchi timin jotonan, yalachi sonalaca seque nenaminlaca quirato Jesucristobe cayainilaichunae. Nula sonalari respetaito seque nenaminlaca quirato, nulachi unilalanan pansile cayailaichunae payitusanan. ³Junni moso sonala jono muquilaquinari, jamoleri moso itolajona! Aca jera moso suwan, óroca quica jun win winquin, uraran tsanpa pun, quitori, jamoleri

moso jolajochunae. ⁴Man malon fecáririri moso ilaichunae; junteri poleniichunae.

Nula mantimini uyan tala moso ilaina! Paituto, seque tenca calaquina! Tsanquitori, jamoleri moso itolajochunae; tencabinan moso jolajochunae. Diosiri junca tsara se joe tichunae. ⁵Matu mate Diosibe penenamin sen sonalari yalachi unilalaca meráminla joto, tsanque moso jominlanue. ⁶Sara tinun sona tsan jominue matute Abrahanchi sona. Yari Abrahambe merámin joto, chiqueca mantamin joe tinue. Junni nulari natiya jeleratuto seque nenatori, ya sona cuwenta jolajochunae.

⁷Unilalanan nulachi sonalaca seque tenca tan nenalarana! Diosi sonalacanan laquirato, yalacanan numatotiya jamochi sonnato polesa carichunae nulaca cuwenta. Jun tenchi sonalaca fe cumana jolajoe tito, yalaca seque cuidailaina! Tsanquitunari, Diosibe rocaínasa merátuchunae.

Seque quinun tenchi padeseino jonunca

⁸Junni jeralelabe man fiquiman pano muquee. Man junni tenca calaquina! Laqui jominlabe pelaquiilaina! Acola tala cuwenta beco beco laquiracaalaguina! Weyanlaca fe joyoe tituto, laquiramin tenca jolajona! ⁹Seiton quiminlacanan beconan seiton quitulajona! Yucacuraminlacanan beconan yucacuratulajona! Te, uyan quiraque nenalarana! Diosiri nulaca seque quichun cayaisa tie. Junni nulanan uyanlachi tenchinan Diosibe rocaínola joe yape yalacanan ticatiya seque quisa. ¹⁰Diosichi Pilabi junca itsanque chuteca joe:

Seque pansi sonnano muquinari, tencabe nenalarana! tinue seitonque patuchun.

Nene patulajona! tinue.

¹¹Seiton quinanunca jera telaquepoto, seque nenalarana! tinue.

Pataatuchique tenfelaina!

¹²Miya Diosiri senlaca sele cuidaichunae.

Tsanque seque nenato yabe rocailainari, meráchunae tinue.

Seitonlaca mantimini paimin joe tinue.

Diosichi Pilabi tsanque chuteca joe.

¹³Junni seque nenachique tenfelainanari, tsachila nulaca pailaituchunae.

¹⁴Junnasanan, pansile seque nenanun tenchi casticaquilaquinari, pansi jolajochunae. Jun tenchi paiminlaca jele tituto, wepanatulajona!

¹⁵Jesucristoca Miya joeque seque tennalarana! Pansile weyanlari nulabe panhalaquichunae ti quichun Jesucristobe cayailaiyunque. Tsanlatinari, tuca tenca calaquina! niyaque beconan manpano jonunca. Fe joyoe tituto, respetaito, cuenta jera quiniquintsan jochunae. ¹⁶Junni Jesucristoca tenca calaquito, nulaca culpa quituntsanque seque nenalarana! Junni nula Crístochi tsachila joto seque nenaminlaca quirato, epele yucacuraminlari

luilaichunae. ¹⁷Aman pansile Diosi nulaca padeseiniisa tichunae. Tsan jonari, seiton quinun tenchi padeseitulajona! Padeseinola jotori, seque quinun tenchi padeseilaina! Ya fe se jochunae.

¹⁸Jesucrístori jun tsanhinue. Sen jotonan, jerale seitonlachi tenchi puyanue yalachi jutsaca piyarito Diosibe cayaisa carichun. Yachi pucari puyaca josanan, Diosichi Tenca yaca mansoncarinue. ¹⁹Junto Diosichi Tencachi mantate doramin puyaca junlaca meracaribi jica jominue. ²⁰Ya puyaca junla matu mate Diosica merátumin jominlanue. Jun mate Diosi yalaca casticaquituto, duque méraminue Noé barco quinasanan. Jun barcobi ochuca tsachilasiri mapiya mate se lolainue. ²¹Pibi mumunhiminlari jun cuwenta se lolaichunae. Junasanan mumunhinun piri to midicaca cuwenta jutsaca mantsaletumin joe. Mumunhinaminlari Diosibe rocaiminla jochunae culpa iton joyoeque tenhichun Jesucristo mansonhica jonun tenchi. ²²Crístori jamochi loto, Apa Diosichi tsa tede nanchi mantato pechue. Junni jerale jamochi nenaminla, anjelilanan, mantá tanlanan, yabe mantaiminla joe.

Jutsaca telaqueponola jonunca

4 ¹⁻²Aman tsachi pucari Diosichi tenchi padeseica junlari jutsaca telaquepoca junla jochunae. Junto puyano fecári tsachilachi mite nenatuto, Diosichi tenca munate nenano podeilaichunae. Junni Crístochi puca padeseinun cuwenta, nulanen jun tsanquenae padeseino tenca calaquina! ³Nulari Diosichi tsachila caituminnan, seitonque nenamin jominlanue uyanla cuwenta. Leyan sona tan, tenca munatenan nenan, winan in, lupiyayan tin nenan, seiton fiesta quin, quito nenaminlanue. Jelenquiran molde quito, yaca diosi joe tito se timin jominlanue. ⁴Junni tsanque canenaminla nulaca wepanaminlae. Niyaito tsanque nenatumin icalayunque panhato wepanaminlae. Wepanato, junsu nulaca seiton tito yucacuraminla joe.

⁵Juntonan nulari yalaca natiya tennatulajona! Manca mate yalari niyan quica jonuncatiya Diosibe jera cuenta quilaquichunae. Diosiri jeralelaca tsanque miichunae casticaquintsan jonunca. Cason jominlacatiya, o numa puyaca jominlacatiya, miiniichunae. ⁶Jun tenchi puyacalabenan sen fiuica meracarinue. Junni jerale tsachila cuwenta yalachi puca yucapiyaca jotonan, yalachi tenca Diosi cuwenta casonnalarachunae.

Diosichi mantate seque quino podeiminla

⁷To jeraino ma queloinae. Jun tenchi tencabe nenato, seque tenca calaquinana! nula Diosibe rocaino podeilaichun. ⁸Junni seque tenca cantsan fiuica chutechinayoe: Nula tala tsarasi laquiracaalaguina! Nulari nulaca duque jutsa quiminlaca laquiratori, yalaca pailaituchunae. ⁹Junsi sen tenca tato, yaca o ano finoca isapunla itolajona!

¹⁰⁻¹¹Diosiri nula jeralelaca man quiraque man quiraque poden suwaca joe. Junni nulari Diosibe man cosa quino podeitori, junca sele quinilaquina! Diosichi tenchi pánatori, seque panilaquina! ya fiqui Diosichi fiqui joeque. Poperelaca ayudainatori, Diosichi sonbabe seque ayudailaina! Beco beco tsanquito nenalarana! Tsanque nenalaranari, tsachila Diosica fécarí se tilatichunae. Tsantino jochunae. Diosica duque se tito, numatotiya mantá tan joe tintsan jochunae.

Jesucristo cuwenta padeseinola jonunca

¹²Nulaca duque laquirato payichinayoe. Nula duque padeseino patinatori, wepanalaituna! Chiquilasiri tsanque padeseilainayoe tituntsan jochunae. Jerale Diosichi tsachila jun tsanquenán padeseicaichunae. Junto wepanalaituna! Nula padeseilainari, Diosi nulaca micarinachunae yape padeseinunca wantaito fe sen jolajosa. ¹³Aman Jesucristonan padeseinue. Junni nulanán padeseilaitori, ya cuwenta jolajochunae. Junni duque son jolajona! Aman inale jeralela Jesucristoca sele quiralaquichunae tsarasi mantá tan jominca. Junni nula amana ya cuwenta padeseitori, jun mate fécarí pansí jolajochunae ya cuwenta joyoe tito.

¹⁴Nulaca Crístochi jonun tenchi yucacuralaquinari, son tilatina! Diosichi tsara sen Tencari nulachi tencabi perchunae. Uyanlari Crístoca seitonque paminla josanan, nulari yaca se timinla joe. ¹⁵⁻¹⁶Junni Jesucristochi tenchi padeseino jonuncasiri pánayoe. Tarintori, o tsachilaca totetori, o uyanlaca pasuwatori, o niyaquetiya seiton quitori, padeseicachiri padeseinola jochunae. Aman tsanque padeseinoca pátiyoe; Jesucristochi tenchi padeseinocari pánayoe. Yachi tenchi padeseitori, natiya luratulajona! Jesucristochi joyoe tito, Diosica duque seque pato, yabe acadeseinola joe.

¹⁷⁻¹⁸Aman Diosi jeralelaca miino óra fechinae. Casalari yachi tsachila patsaca miichunae. Diosichi Pilabi itsanque chutecca joe: Diosi miinasa, sen tsachila jominlatiya duque tenfenato se lolaichunaeque chutecca joe. Junni sen jominlanan tenfenato se lolainari, aman Diosica tennatuto jutsa quiminlari wari jelecari padeseilaichunaeque chutecca joe. Tsanque casalari Diosi chiquilaca miichunae. Junto chiquilacanan miino jotori, yachi fiquica merátuminlacari fécarí miito casticaquichunae. ¹⁹Jun tenchi Diosichi mantate padeseino jotori, wepanalaituna! Seque nenato, Diosica tennana! yape nulaca seque cuidaisa. Yari nulaca quica joto nulaca pansituchunae.

Jesucristobe penenaminlaca payinunca

5 ¹⁻²Jesucristochi tsachila tala mantá tanlacanan payichinayoe. Diosichi tsachilaca cuidainola joe opisaca cuidaiminla cuwenta.

Junni lanan nula cuwenta mantá tan pejoto, tsanque payinayoe. La Jesucristo padeseinaminca quiracayoe. Junni ina uraran mantá tan manquirainasanan, lanan yabe man junni pejoichunae. Junto nulaca payichinayoe. Nulari Diosichi tsachilaca laquirato, seque cuidainola joe cuidaino muquetue tituto. Encanato cala cachiqueri cuidaituntsan joe; Diosichi tsachilaca ayudaichunni yalaca cuidailaina! ³Nulabe miiminlaca sonba mantato patron cuwenta itulajona! Yalabe seque nenalarana! Junni yalari Diosichi opisala cuwenta joto, nulaca quirato, tsanquen an seque nenalarachunae. ⁴Aman Jesucristori jerale Diosichi tsachilaca cuidaimin joe opisa tsacumin cuwenta. Junni nulari yachi tenchi Diosichi tsachilaca seque cuidailainari, yari manquiraitobi, nulacanan beconan seque quichunae yape numatotiya seque mantá tan joto polelaisa.

⁵Junni mantaminlaca payisi, mosolacanan payichinayoe. Nulari unicalaca meralaquina! Junsi jeralelacanan itsanque payichinayoe: Monantiya fe jochi tituntsan joe. Uyanlacari fe jolajoe tintsan joe. Beco beco tsanque tenca cato nenantsan joe. Diosichi Pilabi junca itsanque chutecca joe:

Fe joyoe timinlaca Diosiri paichunae.

Fe joyoe tituminlaca laquirato ayudaichunaeque chutecca joe.

⁶Junni Diosi duque sonban joto, nulaca niyantiya isa carinari, tsanhino muquetue titulajona! Tsantitulajonari, inale Diosiri nulaca fe josa carichunae. ⁷Yari nulaca cuidainae. Junni yaca tennato, ticanantiya wepanatulajona!

⁸Yucan nulaca pa joto, luquela cuwenta atide nena niyanlacatiya mancato fichique. Jun tenchi seque tenca cato tencabe nenalarana!

⁹Diosica seque tennato, yucanca merátuchique tenfelaina!

Padeseinatotiya yucanbe mantaituchique tenfelaina! Jerale tótenan Diosichi tsachila nula cuwenta padeseilainae.

¹⁰Junni nulari nasi padeseinunbi, Diosiri nulaca jera manse patarito, jera sonba tenca mansuwachunae. Nulaca laquirato, niyaquetiya se quimin joe. Junsi Jesucristobe cayaisa ticae yape numatotiya yabe uraran tsente pechuto polelaisa. ¹¹Diosiri numatotiya mantamin joto poleno jochunae.

Tsanqueri joe.

Saludo erenunca

¹²Silvano in pilaca lachi tenchi chutenae. Lachi tencari yari Diosica seque quereimin aco joe.

In pila nacábiri nulaca payito, tuca cuenta quinayoe. Inni Diosi tsarasica paca fiqui joe tinayoe tsachilaca laquirato se suwamin joeque. Junni jun fiquica tennato, natiya peleilaituna!

¹³Babilóniabi chumin Jesucristobe penenaminlanan jera layaito, nulachi saludo erelaquinayoe. Chiquilanan nula cuwentanan Diosi wenteca jun

jolajoyoe. Junni Márconan, lachi nao cuwenta joto, saludo peerenae.

¹⁴Nulari duque laquiracaato, caforole mo tito saludaicaalaquina! Jerale
Jesucrístobe cayaica junlaca pansi wepanatuto chusa tenjae.